

In viva sin il naufragi olimpïc

Ps grischuna: Di da partida

DA GION NUTEGN STGIER / ANR

■ **Glisch verda per las elecziuns preliminaras da la ps grischuna per la regenza. Peter Peyer ed Andreas Thöny èn vegnids nominads uffizialmain sco candidats. Fin uss èn 105 persunas sa registradas per quel sistem da pre-elecziuns. Nova vicepresidenta dals socis grischuns è Doris Caviezel-Hidber.** Il di da partida da la Partida socialdemocratica dal Grischun (ps) ha gì lieu a Cazas e quai en preschientscha da 120 commembers e commembras. Beneventads èn ils socis er vegnids dad *Eduard Decurtins*, il president communal da Cazas, e da *Renate Rutishauser*, la presidenta da la ps Viamala. Il motto da l'occurrèza è stà: «Enavant, nus essan cusseglier guvernativ e lain er restar quai.»

Be ina cuntervusch

Tema central dal di da partida è stà il sistem da pre-elecziuns da la ps per ses candidat per la regenza cun sa retrair cusseglier *Martin Jäger* già suenter duas periodas d'uffizi. Avant in mais ha la ps grischuna preschentà *Peter Peyer* ed *Andreas Thöny* sco candidats per quellas elecziuns preliminaras ch'èn en Svizra in novum. Per sa participar a quellas è basegn da sa registrar per survegnir il material d'eleger per lura eleger ils 25 da zercladur tgenin dals dus candidats ch'è uffizialmain il candidat per il sez che vegn liber da la ps en la regenza. Suenter intgins votums han ils preschents decidì be cun ina cuntervusch d'introducìr quella procedura da pre-



Ils dus candidats da la ps per la regenza grischuna: Andreas Thöny (a san.) e Peter Peyer.

FOTOS G. N. STGIER

elecziuns. Ultra da quai èn lura vegnids nominads Peter Peyer ed Andreas Thöny uffizialmain sco candidats per quellas elecziuns preliminaras. Fin ussa hajan 105 persunas mussà interess per quellas pre-elecziuns, ha ditg *Lukas Horrer*, il manader dal cumbat electoral. La ps quinta dentant che suenter il di da partida cumenza pir dretg l'interess per las elecziuns preliminaras. Horrer è dentant persvas che las elecziuns da la regenza sajan per la ps tut auter che be ina spassegiada.

In augment tar ils commembers

Philipp Wilhelm, dapi in onn president da la ps dal Grischun, ha er fatg ina retrospectiva politica dapi il di da partida 2016 avant in onn a Cuir. Da preschent haja

la ps 641 commemembers e commembras e quai sajan 21 dels dapli che anc avant in onn. Da defender il sez da cusseglier guvernativ *Martin Jäger* saja ina clera finamira, dentant da tegnair, sche betg augmentar il dumber dals deputads e da las deputadas en il parlament saja ina ulteriura intenziun. Dapi l'avust 2016 sajan las secziuns da la ps a la tschertga da candidats e candidatas per las elecziuns chantunales dal 2018. Sin champ communal haja la ps gì il davos onn intgins success cunzunt a Cuir cun in augment da 4,5% ed a Domat cun in augment da 2% tar las elecziuns dal parlament. Cun in cler avantatg sin ses cuntercandidat saja *Patrik Degiacomi* vegnì elegì sco cusseglier da la citad da Cuir. Er en l'avègnir vegnia la ps a far politica transparenta ed a favur da



La vicepresidenta da la ps grischuna Doris Caviezel-Hidber cun il president chantunal da la ps Philipp Wilhelm.

mintga burgais e da mintga burgaisa, ha punctuà Wilhelm.

David cunter Goliat

In dals pli gronds success da la ps grischuna saja bain stada la votaziun pertutgant Gieus olimpìcs 2026 en il Grischun. Quella votaziun saja stada in vair cumbat, cun esser l'economia, il turissem, las federaziuns da sport e cunzunt tut las autras partidas cunter la ps e per l'occurrèza internaziunala en noss chantun. Wilhelm ha cumpareglià quel cumbat da votaziun cun David cunter Goliat. La pussanza da l'economia ed er la regenza hajan fatg gronda propaganda per in GEA ed in-summa saja per part vegnì fatg ina campagna indegna e malgista che haja da far pauc cun democrazia. Tant dapli haja lu-

ra la ps gì plaschair dal resultat da 60% cunter il project Gieus olimpìcs.

Promover in auter turissem

L'economia grischuna haja da vegnir pli moderna ed esser pli schlargiada, il turissem duai esser pli vast, pli ecologic e cunzunt saja er da dar dapli pais al turissem da stad ed al turissem pli miaivel. Decidì, e quai unanim, han ils socis lura er la parola en connex cun la votaziun federala dals 21 da matg: Strategia d'energia 2050. *Doris Caviezel-Hidber*, l'antieriura cussegliera da la citad da Cuir, remplazza *Chatrina Josty* ch'è sa retratga sco vicepresidenta da la ps grischuna. Approvà han ils preschents er il quint annual che serra tar entradas ed expensas da 165 000 francs cun in gudogn da 2451 francs.